

O novo hospital de Vigo e o negocio para cargos do PP

Escrito por Redaccion @valminorinfo
Xoves, 17 Setembro 2015 20:12



As obras do Álvaro Cunqueiro foron encargadas á empresa Acciona, da que foi directora xeral de internacional unha ex alto cargo do PP. Tamén foi contratada unha viceconselleira do Goberno de Madrid. A Plataforma en Defensa da Sanidade Pública estima o custe do hospital en 1.795 millóns, moi lonxe dos 450 millóns que ía custar.

Que hai detrás da construción do novo hospital de Vigo? Quen tivo contratos na súa xestión?. Quen se encargará de cobrar por servizos que antes eran públicos e agora son privados?... Son preguntas que se fan moitos dos usuarios do Álvaro Cunqueiro, asociacións e sindicatos sanitarios e, en moitas das respostas, aparece sempre xente vinculada ao PP.

A maior parte das obras foron adxudicadas a **Acciona**, unha empresa que aparece citada nos papeis de Bárcenas e na que traballou **armen Becerril** C, ex directora xeral de Política Enerxética e Minas co PP, que foi presidenta de Acciona Enerxía ata 2013 e desde 2013 a 2014, directora xeral de Internacional desta compañía. Tamén aparece vinculada a este hospital, **Ana Sánchez, quen foi viceconselleira de Asistencia Sanitaria da Consellería de Sanidade de Madrid**

A Plataforma para a Defensa da Sanidade Pública vincula os recortes e deficiencias no novo hospital de Vigo á falta de control na execución das obras e especificacións técnicas do centro

sanitario. Esta entidade critica que **a Oficina Técnica de Seguimento do hospital fora dirixida pola empresa Efficientia Clinical Management**, firma dirixida por Ana Sánchez, e nomeada na Consellería de Sanidade de Madrid por Juan José Güemes, xenro do ex presidente da Deputación de Castelló, Carlos Fabra.

O 13 de maio de 2011, a entón conselleira de Sanidade, Pilar Farjas- que posteriormente sería secretaria de Estado de Sanidade con Ana Mato- asina unha resolución na que se encarga á empresa pública de servizos sanitarios, **Galaria**, que se faga cargo da **Oficina Técnica de Seguimento (OTS)** do novo hospital de Vigo para “controlar e supervisar o cumprimento da execución do contrato entre o Servizo Galego de Saúde (Sergas) e a Sociedade Concesionaria do Novo Hospital de Vigo S.A.

A OTS tamén se encargará da “redacción dos proxectos, seguimento das obras e seguimento do plan de equipamento, ademais de realizar o seguimento, control e coordinación do conxunto de accións necesarias para a posta en marcha do hospital e coordinar a planificación do traslado”.

Galaria decide ceder todas estas xestións a Efficientia Clinical Management, a compañía de Ana Sánchez- constituída o 27 de xaneiro de 2011, apenas 4 meses antes- que, de acordo coa orde citada, publicada no Diario Oficial de Galicia, debe facerse cargo das mesmas até dous anos despois da posta en marcha do novo hospital, é dicir, até 2017. Ademais, tamén se subroga no que se refire ao cobro da cantidade que debía de ser satisfeita a Galaria para a realización dos labores de control, exactamente 3.957.357 euros, máis IVE, cantidade que debe ser pagada pola Sociedade Concesionaria do Novo Hospital de Vigo S.A., a empresa que construíu o hospital e concesionaria da maioría dos seus servizos non sanitarios.

De acordo coa denuncia da Plataforma, esta empresa, que debe de facerse cargo do control e a supervisión do novo hospital, **aproba o recorte do número de camas, que pasan de 1.465 do proxecto inicial a 845;** tamén se suprimen, integramente, as unidades de Queimados e de Cirurxía Maxilofacial; redúcese o número de quirófanos previstos pasa de 35 a 24, a superficie de Urgencias-a pesar de que o Álvaro Cunqueiro asume as do Xeral e Meixoeiro, que se colapsaron durante anos- queda en 4.300 metros cadrados, fronte aos case 6.000 deseñados e, por tanto, haberá menos camas, exactamente 40 menos: das 72 anunciadas ás 32 reais.

O novo hospital de Vigo e o negocio para cargos do PP

Escrito por Redaccion @valminorinfo
Xoves, 17 Setembro 2015 20:12
